

FJALA E DEPUTETES ALBANA VOKSHI

E ENJTE 17 MARS 2022

Në fakt, ndiej keqardhje që as ju në postin e Kryetares nuk po kapërceni arrogancën e maxhorancës dhe, në shkelje të Rregullores dhe Kushtetutës, po u mohoni të drejtat deputetëve në Kuvend.

Së pari, në datën 23 shkurt së bashku me kolegun Noka kemi depozituar kërkesën për interpelancë me zonjën Balluku, ministre e Infrastrukturës dhe Energjisë, për shembjet e shtëpive në lagjen "5 Maji", në Laprakë dhe në Paskuqan, që e konsiderojmë krim shtetëror për qëllime të projekteve abuzive dhe korruptive. Kanë kaluar më shumë se tri javë dhe, pavarësisht se në nenin 80 të Kushtetutës përcaktohet kjo interpelancë duhet të mbahet që brenda 3 javëve, sot nuk e kemi ende në rendin e ditës. Kemi dy interpelanca të një deputeti të maxhorancës, nuk kam asgjë ndaj dy interpelancave nga i njëjti deputet, por në kushtet kur këta banorë, që jetojnë ende jashtë sot, për shkak se kjo qeveri, në mënyrë antikushtetuese antiligjore, u ka shembur shtëpitë, ju nuk e fusni në rendin e ditës.

Së dyti, në datën 2 mars një grup deputetësh, e përmendi edhe zoti Tritan Shehu, kanë kërkuar mocion me debat dhe miratimin e një rezolute për Ukrainën, në solidarizim me popullin e Ukrainës. Rregullorja përcakton që ju brenda tri ditëve duhej ta kishit mbledhur Konferencën e Kryetarëve; nuk e keni mbledhur Konferencën e Kryetarëve brenda 3 ditëve, përsëri keni shkelur Rregulloren. Unë nuk e di se çfarë jua jep të drejtën të shkelni Rregulloren rast pas rasti, duke mohuar të drejtat e opozitës në Kuvend.

Së treti, ditën e martë 9 deputetë, e theksoi edhe kolegu Spaho, kemi kërkuar interpelancë për çështje urgjente. Justifikimi juaj që kërkesa u dorëzua në ditë feste, ditë pushimi, kur zyra e protokollit nuk punon, dhe nuk u dorëzua ditën e martë, unë mendoj se nuk qëndron. Ju duhet të kishit dashamirësinë, por, edhe si Kryetare Kuvendit, edhe si nënë, edhe si grua, edhe si qytetare shqiptare, që këtë çështje kaq të rëndësishme, për të cilën ka një valë protestash në të gjithë Shqipërinë, ta kishit futur si çështje të parë të rendit të ditës. Nuk mund të ketë asnjë çështje tjetër për t'u diskutuar sot sesa çështja e krizës së çmimeve, e cila prek çdo familje shqiptare. Kjo edhe në solidarizim të të gjithë ne deputetëve për protestat që kanë shpërthyer në të gjithë Shqipërinë.

Unë do të kërkoja që ju t'i jepeni fjalën zotit Spaho për të shprehur arsyet pse kemi kërkuar ne sot ndryshimin e rendit të ditës. Shpresoj shumë që çdo deputet i këtij Kuvendi sot të miratojë ndryshimin e rendit të ditës. Duhet të flasim për krizën, duhet të flasim për çështje që prekin çdo familje shqiptare. Faleminderit!